

Lavina brina en Frantscha

Tgi sa sche la tema dumogna?

DA GUIU SOBIELA-CAANITZ

■ En gnanc in onn ha ina terrur tshorva furià duas giadas amez Paris. Tschients civilists èn morts. President François Hollande ha declerà quai sco in'agressiun encunter la Frantscha e l'Allianza atlantica. «Cui prodest?» dumandass in Roman da l'antica: «A tgi profitescha quai?» Als assassins, segir: I han embarrassà l'Occident, e quai levan els segir cuntanscher. Ma er a giuididers da la dretga extrema franzosa, pia al FN («Front national») che tizza la tema da la gliעד per sa preschentar sez sco salvader. Ils 6 e 13 da december elegian burgaisas e burgais lur cusseglieras e cussegliers regiunals. «Tenor ina retschercha (...) duess la glista FN da Marion Maréchal-Le Pen survegnir 40% da las vuschs tar l'emprim scrutini en la regiun Provenza-Alps (Paca); avant ils attentats dals 13 da november era lezza cifra 'mo' 37%» («Le Courrier», Geneva, 3 da december, p. 9). Tar l'emprim scrutini ha lezza glista vairamain survegnì 40,55% da las vuschs. En mintga regiun da la Frantscha metropolitana, danor la Corsica, duveva il FN survegnir passa 20% da las vuschs tar l'emprim scrutini; quai è daventà, cun l'excepziun da l'Île-de-France (mo 18,41%). La Frantscha sa chatta en crisa. In dals motivs è segir ch'ella n'ha betg savì integrar ina gronda part da las populaziuns oriundas da sias anteriuras colonias africanas ed immigradas a nord dal Mar mediteran durant ils davos decennis. In segund motiv, collià cun l'emprim, ma anteriur e pli profund, è che blera gliעד en Frantscha n'ha anc betg magunà la perdita dal vast imperi colonial. In terz motiv va enavos almain fin al 18avel tschientaner: La relativa flaiveltezza da la vita politica e sociala en las regiuns ordaifer Paris. «Le Monde» dals 4 da december ha publitgà in editorial critic da «directeur» Jérôme Fenoglio, intitulà: «Le Front national, cette imposture.» I suonda in'analisi dal text.

Vanagloria

L'autur punctuescha l'emprim che Marine Le Pen, scheffa dal FN ed onda da Marion Maréchal-Le Pen, haja «l'ambiziun da conquistar la pussanza e da realisar ses program (...). Ins duai perquai prender serius il FN. Las disditgas u flaiveltezzas da



Marion Marechal-Le Pen è la nova fatscha da la dretga extrema franzosa.

KEYSTONE

las partidas che regian la Frantscha dapi decennis han grittentà blera gliעד che vul ussa sustegnair il FN per exprimer meglier disfidanza u ravgia. A quella gliעד ston ins dir e repeter che lezza partida periclitoscha grevmain il pajais. Sia ideologia e sias propostas cuntradin a nossas valurs republicanas, a l'interess naziunal ed al maletg da la Frantscha en il mund (...). Sia 'priorità naziunala' munta ina discriminaziun etnica generalisada areguard plazzas da lavur, abitaziuns e prestaziuns socialas (...). Le Pen manegia che tut noss problems provenian da l'immigraziun; ella dat la culpa als immigrads (...). Ella vul introducir puspè la paina da mort e pretenda ch'ins suspendia immediat la procedura d'asil per fugitivs (...). Ella fa crudar il suspect sin l'entira cuminanza islamica en Frantscha (...). Sia finamira economica centrala è da renunziar a l'euro e restaurar il franc franzos (...). Ma il FN emblida che svalitar ina munaida maina adina a l'impovriment: Ils debits dal stadi explodissan immediat (...). El sincerescha plinavant che l'economia possia crescer e flurir grazia al protecciunissim (...). Ma passa la mesadad dal commerzi da la

Frantscha cun l'exteriur sa splega cun ils pajais da l'euro, ils quals prendessan segir mesiras da repressalias (...). Ina victoria da Le Pen sfratgass er il maletg da la Frantscha en il mund: In pajais fortifitgà davos ses cunfins, obsessiunà da sia purezza etnica, responsabel da la destrucziun da l'Uniu europeica, praschunier en la via tshorva d'in naziunalissem bornà e vilentà che snegass ses passà e ses futur (...). Le Pen sa fa da gronda sa gloriand da persunifitgar 'l'esprit de la France'. Quai è vanagloria en tuts regards. Il FN surmaina adina dapli burgaisas e burgais cun far tema e vender meglier sias fatamorganas. Ma la tema en Frantscha ha adina manà a catastrofes.»

Impedir da gudagnar regiuns

«Le Monde» ha publitgà ses appel paucis dis avant l'emprim scrutini da las eleziuns regiunalas. El leva persvader da na dar la vusch al FN. Il text tuna persvasiv. El conceda che las regenizas dals davos decennis han trumpà bleras votantas e blers votants. Curius èsi ch'el n'appellescha betg a vuschar en mintga cas, sco che primminister Manuel Valls ha fatg ils 27 d'october. Relevant per «Le Monde» pa-

ra pia mo ch'ins na sustegnna betg il FN. Ma tar il scrutini dals 13 da december, tar la tsherna tranter il FN e mo pli in'otra partida, èsi relevant era da sustegnair questa, ch'i saja la republican (dretga), la socialista (sanestra) u lur coaliziun. «Ins duai far tut per impedir ch'il FN gudogna ina regiun» (Valls tenor «Le Monde» dals 2 da december, p. 10); quai n'è betg uschè lev. Suentar festas vegnan lur republican e socialistas a pinar l'eleziun presidenziala da 2017, resguardond las flaiveltezzas ch'ins ha tralascià da reparar; era quai n'è betg uschè lev. Ma tge «catastrofes» chaschunadas da «la tema» manegia la davosa frasa da l'appel? Fa l'autur allusiun a la votaziun parlamentara dals 9 da fanadur 1940 a Vichy, la quala, suenter l'invasiun fulminanta e l'armistizi rigurus da zercladur, incumbensava in marschal veteran dad 84 onns «d'elavurar ina constituiun nova»? Lezs schabetgs d'avant 75 onns fan part da quellas «catastrofes» istoricas che la Frantscha n'ha anc adina betg propi magunà.

* Robert O. Paxton, *La France de Vichy 1940-1944. Paris (Seuil) 1973, p. 40.*